

# Pilemon Leta

## Polimna Iriki Pilemonim pilwa Leta

### Isipkita Yitkak

Onggityam Pilemon Leta irika riga re Polte. I Pol itemb leta yirikonj re Pilemonim pilwa na yet re ti riga yibnonj Kolosai taunind. Si b'ogla ama rika A.D. pipti nain dide siksti wan (59-61) kemag gangga nat yirikonj.

Pilemonimna wiko riga Onesimo yurowam ke wulkip akasinonj Pilemonim pilke, dide ket b'ikonj Roma taun wa. Si re ket ton Roma taun wa yibnonj, ton ket ademb de Polind yodaronj, i dide ket kea gar ke utkunda riga awonj. Seg Pol ket Onesimond onggit leta kima yitmikitonj Pilemonim pilwa. I Pol ket Pilemonind yitenawonj da, “Man b'ogla Onesimomna negir mile awir tamninyit, i ija na ket yir ipket it re Kerisom pilind gar ke utkunda yinggan re dide. Aji goro odede wip yir ipkim it re b'ikeni wiko riga re dide.”

Onggityam kutkut leta dide ninda leta opi re Epeso, Kolosai, i dide Pilipo re odede wip ogenaya im da “Sibibmet Leta”. Mop nokip opimemb leta iriki re Polimna im, re ton yiyata kima naskajog sibibmetind yibnonj de Roma taun wa.

### Simesime Yitkak

<sup>1</sup> Simesime! Kon Pol yete re sibibmet riga nibnyin Keriso Yesu map, dide meraina gar ke utkunda riga Timote, sin itemb leta yirikya re Pilemon mor pilwa e yete re man sowa iminjog gar ke singi iyeni riga mibnyit dide sowa wikomad e mibnyit, <sup>2</sup> i sowa ngimir Apiyam pilwa, i sowa geja riga pila danda kima wikomad Arkipom pilwa, i dide kwa onggit sosim pilwa rinte re b'eoma yokateneny moina metind. <sup>3</sup> Wurur dide ngimbla win kima mera B'u Godim pilke dide Yonggyam Yesu Kerisom pilke.

### Godim pilwa Siteket Yit Pilemonim gatab

<sup>4</sup> I ita winind ite re kon men nyi muwatanenyin yir opmita winind, kon ita mor gatab kor B'u Godind siteket yit yomnikeneny. <sup>5</sup> Mop nokip kon

ita utkunderenyin moina singi b'iyena mile gatab dide gar ke utkunda mile gatab yit. Si man re b'obogil im singi eyeninyit Godimna yina riga, i dide man ita Yonggyam Yesum pilind danda kima gar ke utkunda yoramitenyit. <sup>6</sup>Ɔ kon kwa yir opmitenenyin da man b'ogla danda kima moina gar ke utkunda mile yingg iyenenyit riga wa yirkokar okatam, si man idenatemb komkesa b'ogil gasa kupka wumirjog tauket rinsim re sin omnika eyenindam Kerisom esourenam. <sup>7</sup>Si moina singi b'iyena millet ma sobijog na gar samim dide b'ugowam nomnenenyim, mop nokip kor gar ke utkunda yinggan, man kea yina riga waina kukip ngimbla annikenenyimit.

### Onesimom gatab B'arkita Yit

<sup>8</sup>Ɔ kon re Kerisomna itmikitijog riga nyi kima en. Si onggit paemb kor ita ukoijog danda nibnau moga kesa men ingawam onggityam mile omnikam rinte ra man b'ogla omniket. <sup>9</sup>Aji yu kon, Pol re ke mid en, dide sibibmet nate nibnyin Keriso Yesu map. Si kon ma ingawa yit e motinyin, aji kon b'itena oramisin mor pilwa ra singi b'iyena mile kima e. <sup>10</sup>Si onggit paemb kon men mitenaen kor b'iga Onesimom gatab yet re koina b'igam awonj re kon sibibmetind nibnenenond. <sup>11</sup>Si naskand ton re mor pilwa negir mile omnika riga na yibnonj, aji yu ton re kea mor pilwa dide kor pilwa b'ogil yim b'akawa riga e aeny. <sup>12</sup>Ɔ ton re koina gar ke nony ijai riga e yibim, aji kon tin ita itmikisin mor pilwa. <sup>13</sup>Mop nokip yu kon God ma b'ogil yirkokar bage yit mapae sibibmetind ijobiki nibnyin, si kon singi en da man b'ogla metket kor pilwa ken yim okaenam. Aji mor awir e nya ainy ken yim okaenam. Si kor ija e ukoijog singi ainy da kon tin owama iyenyin dikind sibibmetind kon kima, nokim da idenat ton onggityam moina yim b'akawa pipmet okas ken yim okaenam. <sup>14</sup>Aji kon ma singi en moina imjati kesa koina singi ririrind jabajaba Onesimond owamam dikind ken yim okaenam. Nokim da ke moina b'ogil wiko maka koina il ongka ke rawik, aji b'ogla ra moinajog singi ke tawik. <sup>15</sup>Nangga mop pena Onesimo b'ikenonj mor pilke re minda amaya God singi na da ton man kima wetaweta tainy sobijog ganggand, nokim da idenat ton yimta ke titenj mor pilwa man kima dadal ngirpu kesa wimenam. <sup>16</sup>Nangga ma ji rada ton re moina wiko riga e yibim, aji ton ma ririr e yu jaba wiko riga nena ibim naskand re dide. Mop nokip ton re kea gar ke utkunda riga na awonj. Si ton kornim re ma sobijog singi iyena kima yinggan e au. Ɔ mornim tau ra b'usaya kwa ukoijog singi iyena kima gar ke utkunda yinggan e. Si ton re gim ke moina wiko riga e, aji kwa ton re yipa moina gar ke utkunda yinggan e Yonggyamim pilind. Si ton re kea meraina gar ke utkunda yinggan e au.

<sup>17</sup>Si onggit paemb rada man ita kon kima yipand b'inkeniyit Yonggyamimna wikond, si man b'ogla ija na Onesimond simesime omnyit

odede wip rija e re man ken simesime nomnikenenyit. <sup>18</sup>Ɔ rada ton ke mor nangga negir na momnikawonj o minda yurowam ke moina wulkip emjinonj, man b'ogla tina bebig b'itisket kor pilwa kornim urowatam. <sup>19</sup>Ɔ kon Pol itemb ket koinajog yim kae mor peba mirikaen. Si goro nony, kon ita mor mira mitendaen dem tina bebig omniki gatab. Aji kon ma nok mapae nindeneyin da man yirkokar yokatot re koina wiko kena. Si onggit paemb man molenggyam re wingawinga ke kornim itendam mira et. <sup>20</sup>Si gar ke utkunda yinggan! Yu man toko koina singi ririrind Onesimond simesime yomnene Yonggyamim nyi kima. Ɔ ingkaemb kon okasin b'ogil isma, i ket gar ngimbla okasin Keriso map.

<sup>21</sup>Ɔ kon iminjog yimjasin da man ita koina yit ririrind b'ogil mile omniket Onesimom pilind. Ɔ kwa kon wumir en da man ma onggityam koina yit ririrkip mile nena e omniket, aji man ita b'usaya mogjog ngole b'atindriket. Si onggit paemb kon onggityam leta mor mirikaen. <sup>22</sup>Ɔ kwa yipa yit ite da man kor obai rum notngonjenaet. Mop nokip kon ita netken wa pilwa, ra God temjasiny waina yir opmita kor gatab sibibmet ke opendam.

#### Undwatapu Yitkak

<sup>23</sup>Ɔ Epapra yete re kon kima sibibmetind yibim Keriso Yesu map, men madaemb yit mominy. <sup>24</sup>Ɔ kwa koina wikomadwar opi re Mak, i Aristarko, i Dema, i dide Luk, toda men madaemb yit momnyi. <sup>25</sup>Yonggyam Yesu Kerisomna wurar waina wingawinga kima.